

# monitoring report

Izbori u BiH '96

bulletin of the institute for war & peace reporting & media plan

31 juli 1996

broj 9

## Sedmični pregled BiH medija: 22 - 28 juli 1996

Duh Mostara progona B&H, skoro mjesec dana nakon gradskih izbora, za koje se smatralo da predstavljaju test za opće izbore u Bosni 14 septembra. Odbijanje Hrvatske demokratske zajednice (HDZ) da učestvuje u radu novoizabranog gradskog vijeća Mostara, navodno zbog nepravilnosti u glasanju, pomutilo je budućnost podijeljenog grada, nanijelo daljnju štetu vjerodostojnosti administracije EU i naglasilo teškoće u primjeni izbornih rezultata u regijama koje su zavadjene.

Neriješena svadja u Mostaru, koincidirala je sa poplavom napada na kuće i bogomolje u cijeloj regiji - u gradovima koji su devastirani, u nekim slučajevima jednom, a u nekim i dva puta, u vrijeme etničkih pogroma 1992 i 1993. Premda se činilo da je nasilje podstaknuto sa lokalnog nivoa, ipak ono se javilo u vrijeme intenziviranja zestre kampanje političara i lokalnih medija, koji su odlučni da igraju na niske emocije glasača.

Posebno je žalosno izvještavanje bosanskih medija iz Mostara. Radio-televizijske stanice sa obje strane Neretve poticale su krizu svojim medijskim ratom. Kao što je već ranije primijećeno u ovom biltenu. Odanost "nacionalnoj stvari" često prevladava obavezu prema korektnom izvještavanju, a takav je bio slučaj ove nedjelje u Mostaru.

**HTV Mostar** pokazao se čak ekstremnijim od nekih zagovornika tvrde linije u HDZ-u, kada je voditelj, uzimajući na sebe ulogu kolektivnog autoriteta hrvatske nacije u "Dnevniku" 28 jula izjavio: "Ne može i neće biti više nikakvih ustupaka. 'Igre bez granica' su gotove i mi smo siti laži i prevara sa muslimanske strane. Neće biti više popustljivosti, niti suradnje sa naše hrvatske strane."

**RTV Mostar**, koji otvoreno podržava jedinstveni grad, trudio se da održi profesionalni i moralni nivo, ali je i ova stanica takodjer emitovala emotivno obojene komentare, koji su naglašavali

opasni politički razdor zbog mostarske krize i svaljivali krivicu samo na hrvatsku stranu. U "Dnevniku" **RTV Mostar** od 26 jula, komentator je upozorio: "Odbijanje hrvatske strane da prihvati izborne rezultate, prijeti da postane opasni presedan, po kojem bi svaka stranka koja izgubi na izborima, odbila prihvatiti rezultate i tražila nove izbore, u nadi da ih može dobiti."

**RTV Srpska**, koja redovno javlja o svakom nesuglasju unutar Federacije, kao o znaku prijeteće i totalne dezintegracije Bosne, prikazala je događaje u Mostaru uravnoteženije, premda oportuno. **RTV Srpska** poduzela je neobičan korak, koristeći se sarajevskim listom "Oslobodjenje", da bi prenijela komentare Mihaela Štajnera (Michael Steiner), zamjenika Karla Bilta (Carl Bildt), koji je za hrvatsku brutalnost u Mostaru optužio "mafiju koja kontroliše grad."

Sa svoje strane, **RTV Srpska** odabrala je drugi sporni bosanski grad Brčko, kao mjesto za alarmantne izvještaje o ugroženoj sudbini Republike Srpske.

Govoreći na početku svog prvog službenog predizbornog putovanja, Biljana Plavšić, vršilac dužnosti predsjednika RS, rekla je da će insistirati da se lokalni izbori u Brčkom održe u septembru, bez obzira da li će se međunarodnom arbitražom do tada riješiti status ovog grada. "Dosljedna primjena dejtonskog sporazuma garantovaće da ovaj grad ostane u Republici Srpskoj," rekla je ona.

Podsticanje straha - bilo za ličnu bezbjednost ili ekonomsko preživljavanje - uvijek je bilo efikasno sredstvo predizborne kampanje. Takva taktika odigrala je ključnu ulogu u izborima u Bosni 1990, a izgleda da se ponovo javlja i u 1996. Kao što sugeriraju stranice koje slijede, i političari i neki mediji širom Bosne, čine sve što mogu, kako bi podstakli neizvjesnost, koja će osnažiti politički status quo. Premda se stepen manipulacije razlikuje, konačni cilj ostaje nepromjenljiv.

## Povici preko Neretve

Medijski rat koji je izbio u Mostaru zbog HDZ-ovog bojkota da učestvuje u radu općinskog vijeća, ponovo je pokazao žustrinu kojom neke radiotelevizijske stanice u Bosni napuštaju sve novinarske skrupule zbog političkih rovova. Kao što se moglo primjetiti i na drugim mjestima u Bosni, posebno u Tuzli, u vrijeme krize često su sami novinari ti koji predvode napade, podstičući strah, mržnju i konfuziju.

Kao lojalni sluga HDZ, **Hrvatska televizija Mostar (HTV Mostar)** često preuzima ulogu glasnogovornika Mije Brajkovića, gradonačelnika zapadnog Mostara. Međutim, dok je Brajković mirno prihvatio mandat novog administratora EU, Ser Martin Garoda (Sir Martin Garrod), **HTV Mostar** počela je sedmicu sa ljutitim napadima na EU. Nakon što je oštro kritikovala prethodne administratore, 22 jula voditelj "Dnevnika" **HTV Mostar** rekao je: "Politika integriranja, asimilacije, unifikacije i miješanja - oprostite na izrazu, 'gemišt' - sada će se sigurno nastaviti".

Mada je Brajković sugerirao da EU može ostati - ipak je 23 jula izjavio **Hrvatskom radiju Herceg Bosna**, da je logika koja je označavala općinske izbore, mrtva. "Praktično, danas je novi dan, u kome memorandum o razumijevanju, kad je Mostar u pitanju, više ne važi."

Premda vatreni govor hrvatskog predsjednika Franje Tuđmana 27 jula, nije sadržavao konkretne prijedloge, ipak je doprinjeo da se pojača ksenofobična histerija u radio televizijskim stanicama u Mostaru, koje su pod kontrolom HDZ-a. Hrvatska, upozorio je Tuđman, neće dozvoliti Evropi da "nam nametne rješenja, koja će biti ponižavajuća za ponosnu Hrvatsku... ili u suprotnosti sa interesima hrvatske države i hrvatskog nacionalnog identiteta."

Patriotska dužnost **HTV Mostar** izgleda da doseže čak tako daleko da se prostor u programu daje i lokalnoj mafiji. Nakon optužbi Mihajla Štajnera, njemačkog diplomate, da zapadnim Mostarom vlada hrvatska mafija, **HTV Mostar** je emitovala izjavu Vinka Martinovića, ličnosti iz podzemlja, poznate po svom ratnom nadimku "Stela".

"Svjedoci smo," kaže Martinović, "loših zbivanja u našem Mostaru, od sukoba i pucnjave do bombaških napada. Nekom čudnom logikom, sve se to povezuje sa mojim imenom... Pokazao sam veliki žar u domovinskom ratu protiv agresora i neprijatelja hrvatskog naroda. Spreman sam da se

ponovo borim za svoju naciju, sa istim žarom, posebno za vladavinu pravde i zakona." Martinović nije rekao hoće li razmotriti mogućnost da se bori i za javnu službu.

**RTV Mostar**, koji je pokazao profesionalnu suzdržanost u pokrivanju lokalnih zbivanja, također se pridružio sukobu, agresivnim komentarima protiv HDZ-a. Sedmica je počela s RTV komentarom u kome se kaže: "Ne može se zaista govoriti o mostarskoj krizi. Ovo je kriza unutar HDZ-ovih redova, koju dužnosnici HDZ nastoje nametnuti cijelom gradu. Ovo je milijama daleko od stvarnosti." RTV urednik je nastavio optuživši Krešimira Zubaka, predsjednika Federacije, koji je također Hrvat, da izaziva politički čorsokak. "Njegov cilj je jasan: izbore u Mostaru treba ponavljati sve dok ne pobijedi HDZ."

Do četvrtka, kada je HDZ najavio da neće potpisati "Zajedničku Akciju" - dokument koji produžava boravak administracije EU, **RTV Mostar** je lansirao još jednu kanonadu u večernjem "Dnevniku". Voditelj "Dnevnika" Senad Efića, napomenuo je da gubitak izbora objašnjava HDZ-ov bojkot. "Nakon neočekivanog poraza HDZ, oni više ne žele da vide Evropu u Mostaru."

## Druga vremena, ista stanica

Prije četiri godine, propaganda **Srpske Televizije** doprinijela je izazivanju i opravdanju rata u bivšoj Jugoslaviji. Nakon što je obavila taj posao, ova stanica usmjerila je svoju vještinu ka novom cilju: smjeni poslijeratne vlasti u Republici Srpskoj sa Srpske Demokratske Stranke Radovana Karadžića, na njenog glavnog protivnika, Socijalističku Partiju RS (SPRS). Iza Socijalista stoji, naravno, Slobodan Milošević, čovjek koga se u velikoj mjeri optužuje za podsticanje nasilja.

Utjecaj **Srpske TV (RTS)** je ogroman. Njen signal pokriva ne samo Srbe u Bosni, nego i 200 hiljada srpskih izbjeglica u Srbiji. I kao i sam Milošević, i ova stanica izgleda da se preobrazila od demona rata u andjela mira. U protekle dvije sedmice emitovala je izvještaje, koji kritički govore o rukovodstvu na Palama i podstiču pridržavanje dejtonskog sporazuma. Premda daje veliki prostor opoziciji u RS, **RTS** jednostavno koristi stare trikove u novoj igri.

Dejton zahtijeva od svojih potpisnika i njihovih radiodifuznih sistema da dopuste pristup medijima svim političkim strankama, koje učestvuju na izborima u Bosni. Ali **RTS** se i ne pretvara da je pravedna, ujednačena i otvorena prema različitim

mišljenjima. **RTS** je počela sa predstavljanjem političkih stranaka prošle sedmice, ali samo lijeve koalicije, "Za mir i progres", koju predvode Socijalisti. Žilko Radišić, kandidat Socijalista za bosansko Predsjedništvo dobio je dvije večeri da izloži stavove Socijalista. Laskav portret dr. N. Djurića, kandidata Socijalista za potpredsjednika, čini se da je napravljen tako da impresionira srpske glasače izuzetnim kvalitetom kandidata Socijalista.

Stanica naglašava značaj izbora. Ona stalno podstiče srpske izbjeglice da glasaju. Ali za koga? Ostatak njenog programa to pojašnjava. Večernji informativni program "Dnevnik" prati Socijaliste, kao da su mjesni nogometni klub. U programu je svako veče odvojen termin za ovu stranku. Socijalisti dijele ovu privilegiju samo sa Strankom Jugoslavenske Ljevice, JUL. Prošle sedmice SDS nije čak ni spomenut.

U ostalim vijestima, koje se odnose na Bosnu, **SRT** obično ograničava svoje izvore na one koji će promovirati Socijaliste i njihovu poziciju. U "Dnevniku" 27 jula, proslavljen je "Dan ustanka u Republici Srpskoj" sa izvještajima iz Beograda, Banja Luke i Mrakovice, mjesta na kome su se u Drugom svjetskom ratu održale dvije važne bitke. Stari partizani imali su značajno mjesto u ovom prilogu, koji je ukazao na zajedničku bitku srpskog naroda protiv fašizma. Istog dana, Zoran Lilić, predsjednik Jugoslavije predvidio je da će bosanski izbori dovesti na scenu "nove ljude", "eliminirati svaku vrstu ekstremizma", i zaustaviti sve one, koji traže "zaobilaznim putem reviziju dejtonskog sporazuma". Ovo je bio kristalno jasan napad na SDS.

**TV Srbije** je otkrila svoje karte mnogo prije nego što je i počela predizborna kampanja. U sedmici od 15 do 21 jula, stanica je emitovala česte napade na rukovodstvo sa Pala. Jugoslavenski ministar vanjskih poslova optužio je 15 jula rukovodstvo RS da šteti srpskim nacionalnim interesima, zato što ignorira rok za imenovanje srpskog arbitra za Brčko - optužba koja se čula i kasnije tokom sedmice. Takodjer, tokom sedmice "Dnevnik" je sa očiglednim olakšanjem izvijestio o odstupanju Radovana Karadžića sa položaja predsjednika SDS. 20 jula "Dnevnik" je izvijestio o sastanku Socijalista u Gackom u Hercegovini, gdje je rečeno da "ljudi žele da promijene one na vlasti" i da je "Socijalistička partija spremna da uzme u svoje ruke sudbinu srpskog naroda." TV Srbije izvještava o takvim zahtjevima nekritički i bez nagovještaja da se drugi možda ne slažu s tim. U "Dnevniku" **TVS** svi pjevaju istu pjesmu.

U prošlom biltenu govorili smo o **Hrvatskoj TV** i njenim favoriziranjem Hrvatske Demokratske zajednice u Hercegovini i centralnoj Bosni. Dok **TVS** uzdiže opoziciju, **Hrvatska TV** propušta da spomene da postoji bilo kakva opozicija. Ali obje televizije su očigledno angažirane na istom zadatku, a taj je daleko od poštenog novinarstva. Dvije nacionalne TV mreže rade po nalogu svojih gospodara u Zagrebu i Beogradu. Rat je došao i prošao, ali to se nije promijenilo.

## Gdje je Radovan?

Uprkos poziva na izazov, upućenih od nekih članova rukovodstva RS, Radovan Karadžić je skoro sasvim nestao sa radara **RTV Srpske**. Nakon Karadžićevog pismenog obećanja da će odstupiti sa položaja predsjednika SDS i da će se povući iz javnog života, više se nije ni vidio ni čuo na kontroliranim medijima u RS. Čak je i samo pominjanje bivšeg predsjednika RS i optuženog za ratni zločin, rijetko.

Jedan izuzetak desio se 23 jula u emisiji **TV Pale** "Novosti u 8". Prilikom svoje posjete Brčkom Biljana Plavšić, vršilac dužnosti predsjednika RS, odala je priznanje Karadžiću zato što je žrtvovao svoj lični položaj za dobrobit nacije: "Dr. Radovan Karadžić je pokazao, ne samo u ovoj prilici, nego i svo vrijeme otkada je došao na vlast, da jasno zna šta su prioriteti - da su njegov glavni prioritet narod i država, a tek nakon toga slijedi njegovo mjesto predsjednika."

## Imamo tehničkih poteškoća

Premda **TV Srpska** nastavlja da pruža prostor političkim strankama iz Federacije, ovi programi postaju sve smiješniji. Na početku nestrpljivo očekivanog izbornog programa, koji je 25 jula u studio **TV Srpske** doveo po prvi puta članove SDA, Mirsad Ćeman, generalni sekretar SDA, pozdravio je gledaoce na slijedeći način: "Dobro veče i maksuz selam svima onima kojima to nešto znači". Nakon deset minuta voditelj **TV Srpske** Ružica Kasapović rekla je da su Ćemanove pozdravne riječi bile "diskriminatorne prema nekim gledaocima."

Ćeman je odbio optužbu i ponovio svoj raniji pozdrav s kiselim osmijehom. Voditeljka je zatim upitala Ćemana, zašto nije upotrijebio i druge "religiozne pozdrave" kad se obratio gledaocima **TV Srpske**. U trenutku kad je Ćeman počeo da objašnjava, program je prekinut. Nakon 40

sekundi na ekranu se pojavio natpis "Smetnje." Poslije pauze od 14 minuta, **TV Srpska** je počela sa emitovanjem muzičkih video spotova, bez da je ponudila bilo kakvo objašnjenje o sudbini predizbornog programa, ili gospodina Ćemana.

## Povratak babe

Fikret Abdić, svojevremeno kralj poljoprivrede i vođa krvave i neuspjele bune u sjeveozapadnoj Bosni, prošle sedmice je iz egzila u Zagrebu najavio svoj povratak u bosansku politiku. Mediji u Hrvatskoj i Republici Srpskoj pozdravili su ovo obećanje intenzivnim izvještavanjem sa njegove konferencije za štampu, održane 24.07. Govoreći u ime svoje Demokratske zajednice, koja je zabranjena u Bosni, Abdić je **za Hrvatsku Televiziju** rekao da bi on "garantovao dobru saradnju sa federalnum partnerima i specijalne odnose sa Republikom Srpskom."

U međuvremenu se **Radio Bihać**, koji je usko vezan sa vladajućom SDA, nije trudio da skrije svoju mržnju prema Abdiću. Optužio ga je za guranje lokalnih Muslimana u građanski rat. U svom izvještaju stanica se ne služi direktnim citatima, a Abdića stalno naziva "ratnim kriminalcem cazinske regije."

## Hit lista

"Hyde park" (**Studio 99**), sarajevski popularni i slobodno usmjereni radio program, u kome se javljaju slušaoci, odustao je od svog uobičajenog koncepta prošle sedmice. Kao odgovor na ono što je nazvano "pritiskom protiv medija", program je satiričke ošinuo po političkom establišmentu. Emisija 23 jula bila je posvećena muzičkim komentarima, koji su ostavili samo mali broj političara i političkih institucija ne dodirnutim.

Pjesmu "Mi smo pijane budale" voditelj je posvetio "sjednicama parlamenta". "Iran i 'Viva Communismo' (Živio komunizam)" posvećene su SDA, Bosnjackoj stranci, koja vlada Bosnom. Bivšem bosanskom premijeru Harisu Silajdžiću, glavnom rivalu Predsjednika Alije Izetbegovića među muslimanskim glasačima, posvećena je pjesma "Bojim svoje oči zeleno."

Pjesma "Odlazim zauvijek" bila je za Radovana Karadžića. Biljani Plavšić, njegovom privremenom nasljedniku, za koju je u programu rečeno da pati od nedostatka iskustva sa suprotnim polom, bila je posvećena pjesma "Tako ti je mala moja kad ljubi Bosanac."

Evo još nekih primjera:

"Herceg Bosni" i "militantnom dijelu HDZ" posvećena je pjesma "Pas koji laje ne ujeda." Socijaldemokratskoj partiji pjesma "Gdje su prošle sve godine?"

IFOR-u, pjesma "Djevojke šetaju ulicom".

OSCE-u, pjesma "Majstore, gdje si?"

Ustavotvornoj skupštini Federacije, pjesma "J... ti porodicu."

Hrvatskim i Bosnjackim vodjama u Federalnoj vladi, pjesma "Teško mi je biti s tobom."

U skladu sa duhom emisije "Hyde park", voditelj je pozvao slušaocce da glasaju za svoju najomiljeniju pjesmu. Pobjednici su bili "Šta bi dao da si na mom mjestu?", pjesma posvećena bosanskom predsjedniku Aliji Izetbegoviću i "Bolje je biti pijan nego star", pjesma posvećena Nijazu Durakoviću, predsjedniku Socijal-demokratskih partije.

"Hyde park" se emituje dva puta sedmično na **Studiju 99** - kada rade telefoni. Obično se dešava da telefoni zanijeme usred emisije. Prošle sedmice voditelj je objasnio problem i požalio se na "sve opstrukcije i pritiske protiv **Studija 99** i programa 'Hyde park.'" Telefoni su nastavili da rade.

## Zmaj od Bosne

U Tuzli, dvotjednik "*Zmaj od Bosne*" nastavlja podsticati vatru u korist vladajuće SDA. U broju 120, koji je objavljen 22 jula, list posvećuje izborima sedam od ukupno 20 stranica. Na svih sedam stranica promovira se SDA, dok se opozicija ili ignorira, ili ismijava, posebno vladajuća koalicija u tuzlanskoj vladi, UBSD i SDP.

Jedan dio lista saopćava u cjelosti stavove SDA, bez ikakvih uredničkih intervencija. Na drugoj strani, koja je obično rezervirana za uredničke komentare, "*Zmaj*" je, velikim slovima, objavio imena svih 89 kandidata SDA u Tuzli. Govorima nekih od tih kandidata posvećene su dvije stranice.

U komentaru, urednik "*Zmaja*" Vedad Spahić, napao je izbornu listu vladajuće koalicije u Tuzli, zato što nije dovoljno Muslimanska. Rekao je da ne-Muslimani drže šest, od prvih deset mjesta na listi, i više od 40 procenata ukupnih mjesta na listi.

Ovo je veći procenat ne-Bošnjaka, nego što je to bio slučaj prije rata u općini Tuzla, napisao je on. "To je isuviše za bilo koga, ko ima makar imalo nacionalne svijesti, posebno za borce, koji nisu sasvim zaboravili, koliko je Srba i Hrvata bilo s

njima u rovovima." Nastavio je sa trdnjom da takva lista "gazi dostojanstvo Bošnjačkog naroda."

Nasuprot tome, Spahić hvali novi slogan SDA, "Tuzla Tuzlacima", koji je preuzet od vladajuće koalicije u Tuzli. On je rekao da je SDA eliminirala seljake sa svoje liste i da pokazuje da je ona stranka urbanih ljudi, a ne stranka seljaka.

"Zmaj" je takodjer pohvalno ocijenio skidanje Izeta Hadžića sa liste SDA, nakon što je izviždan na dvije odvojene memoracije, posvećene žrtvama masakra u Srebrenici. U članku se kaže, da se Hadžić "pokazao kao nezreo i naivan političar."

Nasuprot njemu, Ejup Ganić, potpredsjednik bosanske Federacije "preokrenuo je raspoloženje mase u željenom pravcu."

Dio lista posvećen izborima, takodjer sadrži i oglas SDA, objavljen na cijeloj strani. U oglasu je predstavljen polumjesec i slogan "Znamo šta će uraditi Hrvati. Srbi će glasati za sebe. A šta je s vama?"

Na žalost, postaje jako teško razlučiti šta je od onoga što se objavljuje u "Zmaju", reklama, a šta ne.

## Predizborna kampanja u sarajevskoj štampi

Ove sedmice "Oslobodjenje" je ponovo na čelu pisanih medija sa objavljenih 87 tekstova koji se odnose na izbore. Ovaj list dao je dodatni prostor sve većem broju glasova, koji se protive izborima. Nijaz Duraković, predsjednik SDP, izjavio je za "Oslobodjenje", "Izbori će podijeliti Bosnu", dok je Sefer Halilović, lider Bosanske patriotske stranke, rekao da će narod biti ponovo prevaren na izborima.

"Večernje novine" i "Dnevni avaz" oštro su kritikovali HDZ zbog bojkota mostarskog gradskog vijeća. U komentaru "Dnevni avaz" pita "ima li Evropska Unija sankcije za neposlušne".

Period pokrivanja: 22 do 28 juli 1996 Dnevni: *Oslobođenje*, *Večernje novine*, *Dnevni Avaz*.  
Sadmični, petnaestodnevni i mjesečni: *Ljiljan*, *Slobodna Bosna*, *Hrvatska riječ*

naziv lista	broj listova	broj priloga	broj priloga po broju	najčešće zastupljena forma
Oslobođenje	7	87	11-19	vijest, izjava, izvještaj
Večernje novine	5	46	8-10	vijest, izvještaj, komentar
Dnevni Avaz	6	60	8-12	vijest, izjava, izvještaj
Ljiljan	1	5		intervju, anketa, apel
Slobodna bosna	1	3		komentar, reportaža, politička karikatura
Hrvatska riječ	1	5		izvještaj, komentar, vijest

## Voli me, ne voli me....(3)

Tabela ispod prikazuje prisustvo političkih stranaka, njihovih vođa i koalicija u medijima Federacije (RTV BiH) i Republike Srpske (RTV Srpska) u sedmici od 22 do 28 jula. Kolona sa nazivom "Total" govori koliko su puta jedna stranka ili njen lider direktno ili indirektno predstavljeni ili pomenuti u centralnoj informativnoj emisiji RTV BiH i RTV Srpska. Svaku stranku prati rezultat koji se potpisuje vrijednošću +1 za svako pozitivno pominjanje, 0

za svako neutralno pominjanje i -1 za svako negativno pominjanje.

Kolona ( $\Sigma (+,-,0)$ ) predstavlja sumu ovih ocjena. Što je veći broj pozitivnih poena to znači da su mediji imali pozitivniji odnos, naklonost ili simpatije, odnosno, što je veći broj negativnih poena, to su se mediji prema stranci ili njenom predstavniku odnosili sa više kritike ili antipatije. Mediji koji su posmatrani u ovu svrhu su **RTV BiH** i **RTV Srpska**. Analizirane su samo glavne vijesti dana

ime stranke / koalicije	RTV BiH		RTV Srpska	
	total	Σ (+,-,0)	total	Σ (+,-,0)
<i>stranke</i>				
Stranka demokratske akcije	27	+6	18	-18
Srpska demokratska stranka (SZ)	-	-	19	+17
Hrvatska demokratska zajednica BiH	10	-2	9	-9
Srpska radikalna stranka RS	-	-	2	0
Srpska patriotska stranka SPAS	-	-	4	+1
Narodna stranka RS	-	-	3	+1
Srpska stranka Krajine	-	-	4	+1
Liberalna Stranka BiH	1	0	-	-
Liberalno bošnjačka organizacija	1	0	-	-
Bosanska stranka	4	0	-	-
Građanska demokratska stranka BiH	6	0	-	-
Muslimansko bošnjačka organizacija (1)	4	0	-	-
Hrvatska seljačka stranka BiH (1)	2	0	-	-
Unija bosanskohercegovačkih socijaldemokrata (1)	1	0	-	-
Socijal demokratska partija BiH (1)	2	0	-	-
Socijalistička partija RS (3)	-	-	2	0
Jugoslovenska levica RS (JUL) (3)	-	-	2	0
Socijalno-liberalna stranka RS (3)	-	-	2	0
Stranka nezavisnih socijal-demokrata RS (3)	-	-	2	0
Nova radnička partija	-	-	2	0
Stranka demokratskog centra Trebinje (2)	-	-	1	0
Seljačka radnička stranka Kozarska Dubice (2)	-	-	1	0
Demokratska stranka Bijeljina (2)	-	-	1	0
Nova radikalna stranka "Nikola Pašić" (2)	-	-	1	0
Otađbinska stranka Banja Luka (2)	-	-	2	0
Radikalni otađbinski front "Nikola Pašić"	-	-	1	+1
Stranka privrednog prosperiteta	3	0	-	-
BH Patriotska stranka	2	0	-	-
Republikanska stranka (1)	1	0	-	-
Stranka srpskog jedinstva	-	-	2	0
Srpska seljačka stranka	-	-	2	0
Srpska patriotska stranka	-	-	1	+1
Saborna narodna stranka	-	-	1	0
<i>koalicije</i>				
Demokratski patriotski blok RS	-	-	2	0
Savez za mir i progres RS	-	-	3	-1
Združena lista za Bosnu i Hercegovinu	2	0	-	-

(1) Stranke uključene u Združenu listu za BiH (Federacija BiH)

(2) Stranke uključene u Demokratski patriotski blok RS

(3) Stranke uključene u Savez za mir i progres RS

U protekloj sedmici posmatrani su sljedeći mediji: *Radio&TV Srpska, Radio&TV BiH, Radio Studio 99, NTV 99, NTV Hayat, TV Zenica, NTV Zetel, Radio Zenica, Radio Tuzla, TV TPK Tuzla, TV Tuzla, Radio Prijedor, Radio Bihać, Radio&TV Mostar, Hrvatska TV Mostar, Radio Herceg Bosna Mostar, Radio Krajina Banja Luka, TV Srbije, Hrvatska televizija, Oslobođenje, Večernje Novine, Dnevni Avaz, Ljiljan, Slobodna Bosna, Hrvatska riječ*

izvještaj IWPR i MEDIA PLAN; Direktor projekta: Mark Wheeler

Obala Kulina bana 4/I, 71000 Sarajevo, BiH

Tel/fax 071-667-734/735

E-mail: MEDIAPLAN\_ZU@ZAMIR-SA.ztn.apc.org

100445.2322@compuserve.com

Institut za ratno i mirnodopsko izvještavanje (IWPR) je britanska dobrotvorna ustanova, osnovana sa namjerom da pomaže razvoj nezavisnih medija i da podrži umjerene glasove u bivšoj Jugoslaviji. Ovaj institut također izdaje *War Report (Ratni Izvještaj)* nezavisni mjesečni list, i *Tribunal*, dvomjesečni časopis o Međunarodnom tribunalu za ratne zločine u Hagu. Za pretplatu i druge informacije obratite se na IWPR 33 Islington High Street, London N1 9LH. Tel +44-171-713-7130 / Fax 713-7140/ E-mail: warreport gn.apc.org.

Media Plan je prva privatna organizacija u BiH specijalizovana za istraživanje i analizu medija. Glavni cilj mu je da promovise obnovu i razvoj medija u BiH. Organizacija raspolaže opsežnom bazom podataka o BiH medijskoj slici.

Sa zahvalnošću napominjemo da ovaj projekat podržavaju Swedish International Development and Cooperation Agency, Open Society Institute, Friedrich Naumann Stiftung i Winston Foundation for World Peace.

